

1 Petro

JANDIKO: Jaote Petro

KAR NDIKO: Ok ong'ere to onyalo bedo Rumi

KINDE NDIKO: 63-64 E YIK RUOTH (AD)

GIK MANIE IYE:

Jaote Petro nondiko baruani ka thone chiegni mondo ojiv kendo oho jo-Kristo ma jo-Yahudi mane odak Asia matin. Otemo nyisogi ni sandruok en gima nyaka timre e ngima ja-Kristo kendo ni Nyasaye nigi pok maok lal ne jogo mogeno kuome. Kadipo ni nenitiero jomoko mane paro dok e din jo-Yahudi mondo mi kik ginwang' sand, Petro nyiso kanisa ni koro osebedo oganda moyier kendo jodolo mag Nyasaye (2:9).

Omiyo paro moro amora mar dok e din jo-Yahudi en kayiem nono. Petro bang'e tiyo gi ranyisi mar Kristo mane osandore kendo jiwo joma oyie mondo oikre ne gima chal kamano. Baruani rumo kod puonj mopogore opogore ne oganda mopogore opogore mar jo-Kristo .

THORRO:

Puonj maduong' mar Petro mokwongo en locho kokadho kuom sand.

Jo-kristo machon ne odak e ngima matek; yiegi ne nyalo miyo oneg-gi, to baruani nyiso ni en gima kare kata obedo ni ang'o maditimre. Nyasaye ong'eyo gik moko timre kaka berne. Nyaka waket yiewa kuome kendo wabed kawengewa ng'iyi polo gi geno kawang'eyo ni dalawa en kuno maok piny ka.

WECHÉ MOCHAN KAE GIN

1. Duong' mar warruok mar Kristo (1:1-25)
2. Luor mar ja-Kristo (2:1-10)
3. Sandruok kod ranyis mar Kristo (2:11-25)
4. Dak ja-Kristo e dala kendo e piny (3:1-17)
5. Sandruok kod ranyisi mar Kristo (3:18-4:9)
6. Tij ja-Kristo kod weche mogik (5:1-14)

1 Petro, ma jaote Yesu Kristo, Ne joma Nyasaye oyiero ma gin welo e piny Peter, kendo mokere kuonde duto mag Ponto, gi Galatia. ²Moseyier, chon kaluwore gi dwaro mar Nyasaye Wuoro, kuom tich mar pwoth mar Roho, winjo chik mar Yesu Kristo gi lwok kuom chwer mar rembe:

Ng'wono kod kuwe obednu mogundho.

Pak Ni Nyasaye Kuom Geno Mangima.

³Pak ni Nyasachwa ma en Wuon

Ruodhwa Yesu Kristo! Kuom kechne maduong', osenyulwa manyien mi wayudo geno mangima kuom chier mane Yesu Kristo ochiergo oa kuom joma otho, ⁴kendo e mwandu mosiko ma okanono e polo maok nyal lal bende ok nyal kethore kata lokore. ⁵Jogo morit kuom yie gi teko mar Nyasaye nyaka chop warruok moseiki mondo oel e chieng' giko. ⁶Umor mathoth kuom wachni, kata obedo ni sani pod uneno sand mopogore opogore kuom kinde matin. ⁷Magi osetimorenu mondo yie maru man gi nengo mologyo dhahabu

ma kethore kata obedo ni ipuodhe e mach mondo ong'e ka un-gi yie maradier mondo mi okel pak gi duong' kod luor chieng' ma Yesu Kristo ofwenyore. ⁸Kata obedo ni pok unene to pod uhère ahera; kendo kata obedo ni ok unene kata sani to pod uyie ayiea kuome kendo upong' gi mor maduong' mokadho wacho. ⁹Nikech koro uyudo thorro mar yie maru, ma en warruok mar chunjeu.

¹⁰Kuom wach warruokni jonabi mane owuoyo kuom wach ng'wono mane biro birono ne jonono matut kendo manyo matek. ¹¹Ka gidwaro mondo ging'e kinde kod gigo manotimore mane Roho mar Kristo mane nikuomgi ne nyiso kanokoro kuom masiche mane Kristo biro yudo kod duong' mane biro luwo masichego. ¹²Nofweny nigi ni tich mane gitiyo ne ok giti nigin giwegi, tone gitiyo mana neun kane giwuoyo kuom gik ma koro osenyisu gi joma oseyalonu Wach Maber kuom teko mar Roho Maler moa e polo. Koda ka Malaike bende gombo mondo onee.

Beduru Maler

¹³Emomiyo ikuru pachu ni tich. Ritreuru, kendo keturu genou duto kuom ng'wono mibiro miu ka Yesu Kristo ofwenyore. ¹⁴Kaka nyithindo mawinjo wach, kik ulu kit gombo maricho mane uluwo chon kane pod udak e kia. ¹⁵To mana kaka Jal moluougou ler, beduru maler e gimoro amora mutimo. ¹⁶nikech ondiki ni, "Beduru maler nikech aler."

¹⁷Kaka uluongo nying Wuoro ma ng'ado bura ne tich ng'ato ka ng'ato machalre ka ok odew wang' ng'ato, daguru ngimau kaka welo e piny-ka, kod luor mowinjore. ¹⁸Nikech ung'eyo ni ne ok owaru gi gik ma kethore, kaka fedha kata dhahabu, mondo uwe kit ngimau manono mane kwereu machon oweyonu mondo ulu, ¹⁹to gi remo ma nengone tek mar Kristo, ma en Nyarombo maonge mbala kata songa. ²⁰Ne oyiye kapok ochwe piny, to ne ofwennwago e ndalo gi mogik nikech un. ²¹Nikech En, koro uyie

kuom Nyasaye, mane ochiere oa kuom joma otho mi omiye duong' mondo yie maru kod geno maru obed kuom Nyasaye.

²²Kaka koro usepwodhuru uwegi kuom luwo adiera, mondo eka uher jowetue, koro herreuru ng'ato gi ng'ato gi hera matut, kendo timuru kamano gi chunyu duto. ²³Nikech osenyulu nyuol manyien, ok gi kodhi ma top, to gi kodhi ma ok tow, gi wach Nyasaye mangima kendo mochwere. ²⁴Nikech Ndiko wacho ni,

"Dhano duto chalo gi lum kendo duong' ma gin-go chalo mana gi mafua mar bungu. Lum ner kendo mafua two mi lwar piny, ²⁵to wach Ruoth osiko nyaka chieng'".

To mae e Wach Maber mane oyalnu.

2 Emomiyo weuru timbe maricho duto kod wuondruok duto, kod ndogruok, gi nyiego kod kuoth eyo moro amora. ²Mana kaka nyithindo mayom, beduru gi siso gi chak mayom mar chunyu mondo kumadhe to omi udongi e yor warruok, ³nikech koro usebilo Ruoth mi uyudo ni ober.

Kidi Mangima Kod Joma Oyier

⁴Kaka ubiro ire, Kidi mangima mane ji odagi to ma Nyasaye oseiyero man-gi ohala kuome. ⁵Un bende kaka kite mangima, igerou e ot mar chunyu mondo ubed jodolo maler machiwo misango mag chunyu ma Nyasaye oyiego kuom Yesu Kristo. ⁶Kaka e Ndiko owacho, ni,

"Neuru, achungo kidi e Zayun, en kidi moyier kendo ma nengone tek moriwo kor ot, to ng'at moyie kuome ok none wichkuot."

⁷Kidini nigi nengo matek mana ni un joma oyie. To kuom joma ok oyie to, "Kidi mane jogedo odagi koro osedoko kidi moriwo kor ot" ⁸kendo, "En kidi machwanyo ji kendo en lwanda mamiyo gipodho."

Gichwanyore nikech gitamore winjo wach, mabende mano ema ne oiknegi.

⁹Un to un oganda moyier. Un jodolo ma joka Ruoth kendo un oganda maler mar Nyasaye mane oyiero mondo ohul tijege miwuoro, kane oluongou mi ua e mudho kendo udonjo e lerne miwuoro. ¹⁰Chon ne ok un ji, to koro un jo Nyasaye, chon ne pok okechu, to koro osekechu.

¹¹Joherana, ajiwou, kaka jowuoth kendo kaka welo e pinyini, mondo uwe gombo maricho mag ringruok makedo gi chunyu. ¹²Daguru ngima mabeyo e kind jopiny makia Nyasaye mondo kata ka gihangou ni un joketho to gine mana timbeu mabeyo mi gimi Nyasaye duong' chieng' ma enolimwae.

Winjo Joloch Kod Ruodhi

¹³Ng'ato ka ng'ato kuomu nyaka winji joloch duto moketi mondo orit ji, nikech Ruoth ema dwaro ni utim kamano, kata en ker man-gi teko e wi ji duto, ¹⁴kata en jatelo ma ker oketo mondo okum joketho to opwo joma timo maber. ¹⁵Nikech en dwaro Nyasaye mondo utam weche manono mag joma ofuwo gi timbeu mabeyo mutimo. ¹⁶Daguru ka joma ni thuolo, to kik ukonyru gi thuolo ma ungo kaka rageng' mar timo richo, daguru kaka jotich Nyasaye. ¹⁷Chiwuru luor mowinjore ni ji duto. Heruru jowete duto mowar. Luonuru Nyasaye. Miuru ker mar piny luor.

¹⁸Wasumbini winjuru ruodhiu gi luor duto. Kik uluor mana ruodhi mabeyo kendo maok kwiny kodu, to luoruru koda mago makwiny kodu. ¹⁹Nikech en gima ber ka dhano oyie ting'o rem mar chandruok moyudo kayiem nikech ong'eyo ni Nyasaye nikode. ²⁰Ere kaka ng'ato diyud pak ka oyudo goch mikumego nikech ojaketho? To ka isandi nikech tim maber mitimo, kendo ka inano e bwo sand ma kamano, to Nyasaye pwoyi. ²¹Mano e kit ngima mane oluongu nikech Kristo nosandi nikech un, mi ne oweyonu ranyisi mondo un bende uluw ndache.

²²Ne ok otimo richo kata achiel, kendo onge ng'ama nowinjo miri-ambo manowuok e dhoge.

²³Kane oyanye to ne ok oduoko jomane yanye gi ayany, kane osandore to ne ok okuong'o joma ne sande. Kar timo kamano to noketo genone kuom jal ma jang'ad bura ma kare. ²⁴En owuon noting'o richowa e ringre kane otho e yath mondo eka wan wadok joma otho ne richo, to wabed mangima ni timbe makare; gi adhondene ema osechangu. ²⁵Ne uchalo mana rombe moruenyo, to koro oseduogu e yo mondo ulu Jakwath kendo Jarit mar chunjeu.

Mon Gi Chwo

3 Kamano bende un mon luoruru chwou, mondo kaponi moko kuomgi pok oyie wach to gilokre, ok nikech weche to nikech timbe mondegi, ²kaginenno bidhruok gi luor e ngimau. ³Ber maru ok onego onenre mana kuom gik mulichogo dendu maoko: kaka wich mokadi gi ruako bangli mag dhahabu kod lewni mabeyo. ⁴Chutho moloyo, ber maru onego obed mano maiye, e chunyu ber madier mar chuny mamuol kendo mokuwe ma en gima duong' moloyo e wang' Nyasaye. ⁵Nikech kamano e kaka mon maler machon mane oketo genogi kuom Nyasaye ne loso bergi maiye. Ne giwinjo wach chwogi giwegi, ⁶mana kaka Sara, mane winjo Ibrahim kendo luonge ni ruodhe. Un udoko nyige ka utimo gik mabeyo gi chir maok uluoro gimoro.

⁷Un chwo bende nyaka udag gi mondu kuweyonigi korgi. Migiuru luor kaka chwech mang'aw kendo kaka jouteu muchamogo mich mar ngima momiu kuom ng'wono. Kutimo kamano to onge gima biro mono lemou chopo e nyim Nyasaye.

Neno Sand Kuom Timo Maber

⁸Mogik, neu ru ni un duto un gi chuny achiel. Beduru gi miwafu e kindu

kuheroru kaka owete, kendo kukechoru, ng'ato gi ng'ato, kubedo joma muol. ⁹Kik uchul richo kar richo, kata ayany kar ayany. To gi gwech, nikech mano ema omi noluongu, mondo uyud gweth un bende.

¹⁰Nikech

"Ng'ama diher ngima maber kendo neno ndalo maber nyaka geng' lewe kuom richo kendo dhoge, kuom wacho miriambo. ¹¹Nyaka olokre owe richone mi otim maber; nyaka omany kuwe kendo oluwe. ¹²Nikech wenge Ruoth osiko kang'iyoy joma timbegi beyo kendo ochiko ite mar winjo lamogi, to wang' Ruoth mon gi joma timo richo"

¹³Ere ng'ama dihinyi ka iikori mar timo gima ber? ¹⁴To kata ka ochuno ni nyaka ine sand kuom gima kare mitimo, to in ng'ama ogwedhi. Kik uluor gik ma giluro, kendo kata bwok kik gibuogu. ¹⁵To miuru Kristo duong' ei chunyu kaka Ruoth Maler. Beduru moikore kinde duto mar duoko ng'ato mopenjou gimomiyo un gi geno ma un-gono. To timuru kamano gi muolo kod luor. ¹⁶Rituru chunyu maler maonge bura, mondo joma wuoyo kuomu marach kuom timbeu mabeyo kuom Kristo, ong'eng' kendo one wichkuot. ¹⁷En gima ber ka en dwaro Nyasaye, mondo osand ng'ato kuom timo maber molooyo ka ng'ato yudo sand kuom timo richo. ¹⁸Nikech Kristo notho ni richo dichiel mogik, Ng'at makare notho kar joma richo mondo okelu ir Nyasaye. Ne oneg ringre, to kata kamano nomiye bedo mangima e chuny. ¹⁹Kuom chuny nogo bende ema notere moyalo ni chunje manie tuech, ²⁰mane otamore winjo Nyasaye chon gilala kane Nyasaye orito aming'a e kinde mane Noa hondhoe yie. E yieno ji manok kende maromo ji aboro, ema ne okwo kakalo e pi. ²¹Pigni ochung' kar batiso makoro warou un bende, ok kuom golo chilo e del, to kuom keto ranyisi mar paro molokore odok kor Nyasaye.

Owarou kuom chier mar Yesu Kristo, ²²moseidho e polo kendo koro obet a bat korachwich mar Nyasaye, ka malaike duto gi loch kod teko duto winjo chikne.

Dak Ni Nyasaye

4 Emomiyo, kaka Kristo noneno sand e ringruok, un bende nyaka umanru gi paro machal gi mare, nikech ng'at mane oneno sand e dende koro oseloyo richo. ²Kuom mano, un koro ok udak e ngima maru mar pinyni mondo uchochombo maricho mag dhano, to odak mar timo dwaro Nyasaye. ³Nikech usekawo thuolo malach kinde mokalo kutimo gik ma jopiny ohero timo, kaka: dwanyruok, gombo, mer, tugo e thum, metho mar anjawa kod lamo nyiseche manono. ⁴Jopiny tinde wuoro niok urip kodgi e timbe mag anjawa makamago omiyo koro giyanyou. ⁵To ochunore ni ginihul wach man kuomgi giwegi ni Jal moikore mar ng'ado bura ni joma ngima gi joma otho. ⁶Nikech mano emomiyo ne oyal Wach Maber koda ka ni joma koro osetho, mondo eka obi ong'adnegi bura, kaka nong'ad ni ji duto manie ringruok, to chunygi mondo obed mangima kaluwore gi dwaro Nyasaye.

⁷Giko gik moko duto chiegni. Emomiyo beduru gi paro maler kendo ritreuru mondo ulam. ⁸To molooyo mago duto, herreuru gi hera matut ng'ato gi ng'ato, nikech hera umo richo mang'eny. ⁹Ruakuru joweteu maok ung'ur. ¹⁰Ng'ato ka ng'ato mondo oti kod mich moro amora mosemiye mondo okonygo jomoko. Ka utiyo gi kinda kaka jorit mag ng'wono mopogore opogore ma Nyasaye omiyo kuom konyo ji. ¹¹Ka ng'ato wuoyo to mondo owuo mana ka ng'ama hulo weche mowuok e dho Nyasaye owuon. Ka ng'ato tiyo ni ji, to onego otim kamano gi teko ma Nyasaye chiwo, mondo kuom gik moko duto ji opak Nyasaye kuom Yesu Kristo. Duong' gi teko mondo obed mare chieng' manyaka chieng'. Amin.

Sand Kuom Bedo Ja Kristo.

¹²Osiapena mahero, kik ubuogi ka uyudo sand mawang'ou ka mach kuparo ni gimoro magalagala ema timorenu. ¹³To beduru mamor nikech oriwu kod Kristo e sandne, mondo unudok moil chuth chieng' ma duong'ne nofwenyre. ¹⁴Ka iyanyou nikech nying Kristo to un joma ogwedhi, nikech Roho mar duong' kendo mar Nyasaye ni kuomu. ¹⁵Ka ng'a-to kuomu neno sand to kik bed nikech ojanek kata ojakuo, kata jamahundu, kata jaketre e weche ji. ¹⁶To ka ineno sand nikech in ja Kristo to kik wiyi kuodi, to gone Nyasaye erokamano nikech iluongi gi nyingno. ¹⁷Nikech saa koro osechopo ming'adoe bura ni jood Nyasaye. To ka wan ema ochakore kodwa kamano to uparo ni joma ok luw Wach Maber mar Nyasaye to biro neno malit machal nadi? ¹⁸To

"Ka en gima tek mondo owar joma timbegi beyo, koro joma kia Nyasaye gi joricho to nobed machalo nadi?"

¹⁹Kuom mano joma neno sand kaluwore gi dwaro Nyasaye onego ochiw chunyi e lwet Jachuech ma jaadiera kendo onego gidhi nyime gi timo timbe mabeyo.

Ni Jodongo Gi Jomatindo

5 Akwayo jodong kanisa man e dieru, kaka jaduong' wadu mane oneno gi wang'e kaka Kristo sandore, kendo kaka achiel kuom joma biro yudo duong' mabiro fwenyore achien: ²Beduru jokwath mag romb Nyasaye moseketo e lwetu mondo urit. Tiuru nigi kaka jorit, ok nikech ng'ato ochunou, to nikech chunyu ohero, kaka Nyasaye dwaro ni utim. Kik ubed jokwath nikech wuoch pesa omakou, to timuru kamano nikech tij

konyo ji bernu. ³Kik utimru ruodhi ewi joma oketi elwetu mondo uriti, to bed ne giuru ranyisi. ⁴Eka ka Jakwath Maduong' nofwenyre to unuyudi osimbo mar duong' ma nosik ka rieny nyaka chieng'.

⁵Un jomatindo bende winjuru joma dongo. Ruakreuru gi muolo e kindu ng'ato gi ng'ato, nikech Ndiko wacho ni, "Nyasaye osin gi josunga to ochiwo ng'wono ni joma muol."

⁶Emomiyo belreuru e bwo bad Nyasaye maratego, mondo eka oting'u malo e kinde mowinjore. ⁷Keturu dwachu duto kuome nikech oherou.

⁸Bed kuritoru kendo motang'. Jasiku, ma en Jachien, bayo ka gi kacha mana ka sibuur maruto, komanyo ng'ama dongam. ⁹Chunguru motegno e yie maru kendo tameuru, nikech ung'eyo ni joweteu moyie piny ngima bende neno chandruok machalre kodu.

¹⁰Ka useneno chandruok kuom kinde moromo, Nyasach ng'wono duto, mane oluongou e duong'ne mochwere kuom Kristo, nomi ubed maler chuth, kogourou udoko motegno kendo mojing'; e misingi maok yiengni. ¹¹Teko obedne chieng' ma nyaka chieng'." Amin.

Mos Mogik

¹²Andikonu barua machwokni ka Silfano, ma akwano kaka owardwa madier kuom Kristo, konya. Ajiwou kendo atimo neno ni ma e kaka ng'wono madier mar Nyasaye chalo, omiyo chunguru motegno kuom ng'wonono.

¹³Kanisa man Babulon, ma Nyasaye oyiero kaachiel kodu, okowonu mos. Wuoda Mariko bende omosou. ¹⁴Mosreuru ng'ato gi ng'ato gi yogruok mar hera.

Kuwe mondo obednu un duto ma un kuom Kristo.